

ያቆቤ ግሬዳ ኪታ ጊዶ ቆፋ

ሃይሲ ያቆቤ ኪታዚ አሲ ሃች ሃች ዳና ዱሳ ጊሽ ዮተዛዝ ጊዲሺን ኢዚ ግሬቲዳይ ዱማ ዱማ ደሬን ላሌቲ ዲዛ ታማኔ ናምዑ ኢስራዔል ዛርኬታሳ፤ ሄሳ ግሬዳዲይ ኑኒ ኑ ኤራቴስ አሶን ፔይሻና ኦጌ ጊሽ አማኒዛ አሳ ሞኮ ጊሺኔ አማሌ ሎዔሳና ኦጌ ቤሲዛ ዮጋታ ቆንጨሲዛ ሃሳያታ ሌሚሶራ ቤሴስ። ማንቆቴሳ ጊሽ፣ ፓጩ ጊሽ፣ ሎጋ አማሌ ጊሽ፣ ቃንጌቴሳ ጊሽ፣ አማኖ ጊሺኔ ሎጋ አሶ ጊሽ ኢንግርሳ ኢታቴሳ ጊሺኔ ሎዔቴሳ ጊሽ፣ አዶ ኤራቴሳ ጊሽ ኢሶይ ኢሳራ አሻ ጊሽ፣ አቶሬቴሳ ጊሺኔ አሺኬቴሳ ጊሽ፣ ሃራ አሳ ቦላ ፒርዳ ጊሽ፣ ጨቁቴሳ ጊሽ፣ ዳንዳያ ጊሺኔ ዎሳ ጊሽ፣ አማኒዛይቲ አሳናስ ቤሲዛ ሚሻታ ሁዔን ሁዔን ግሬዴስ።

ሃ ኪታዚ አማኖይ አማኖ ዴዓን አሴታና ቤሲዛ ኦጌታ ሎዔሳ ቆንጨሴስ።

- ሃ ማፃፋይ አይኪዳ ኩሜሳ ቆፋ
- ጌሎሶ 1:1
- አማኖኔ አዶ ኤራቴስ 1:2-8
- ማንቆቴሴኔ ዱሬቴስ 1:9-11
- ፓጩ 1:12-18
- ዎሳ ቃላ ሲይዲ አሶን ፔይሾ 1:19-27
- ኦጌይ ባይንዳ ማዶ ማዶንታ ማላ ኢሜቲዳ ቆፊሶ 2:1-13
- አማኖኔ አሶ 2:14-26
- አማኒዛዴኔ ኢዛ ሃሳያ 3:1-18
- አማኒዛዴኔ ሃይሳ ሃ አላሜዛ 4:1-5:6
- ዱማ ዱማ ሃኖታ ጊሽ ኢሜቲዳ ዞሬ 5:7-20

1 ዎሳ አሳንቻኔ ዩሱስ ኪርስቶሳ አሳንቻ ጊዲዳ ያቆቤፔ ቢታ ቦላ ላሌቲዳ ታማኔ ናምዑ ኮቻታስ ሳሮቴሳ ኢንቴስ ጊዶ። *

ሜቶኔ ፓጩ
2 ታ ኢሻቶ! ኢንቴ ቦላ ዱማ ዱማ ዋዬይ ጋኪኮ ሄሳ ዉርሲ ኡፋይሳን ቆዲቴ። 3 ጋሶይካ ኢንቴ አማኖ ፓጩቴሳ ኢንቴስ ዳንዳያ ኢሚዛይሳ ኢንቴ ኤሬታ። 4 ኢንቴ ዳንዳያን ሚኒ

* 1:1 ማቶ 13:55፣ ማር 6:3፣ ሃዋ 15:13፣ ጋላ 1:19

ኤቃናይሲ ኢንቴስ ኢሲ ሚሺካ ፓጮንታ ኩሚሳ አሲኔ ዎሶይ ባይንዳይታ ጊዳና ማላ አሶ። 5 ኢንቴ ጊዶሬ ኦናስካ ኤራቴሲ ፓጪኮ ኦናካ ሌቆንታ ባ ኪያቴሳራ ኡባስ ኢሚዛ ያሳ ዎሶ፤ ኢዛይስካ ኢሚታና። 6 ጊዶ አቲን ሲዴይ ባይንዳ አማኖን ዎሶ። ጋሶይካ ሲዲዛይይ አባ ቃሲዛ ዳምባላ ጫርኮ ማላ። 7 ሄሳይይ ጎዳፔ አይኮካ ዴማና ጊዲ ቆፖፎ። 8 ሄሳይይ ናምቡ ቆፋን አይኬቲዲ ባ ቢዛ አጌ ቦላ ያኔ ሃኔ ጊዛ አሳ ማላ።

9 ካሴ ዚቃ ዱሳን ዲዛይ ያሲ ዶቁ ሂስታና ጊሽ ኡፋዮቶ። 10 አሳ ዱሬቴሳ ማታ ጨሻ ማላ ቆካና ጊሽ ዱሳን ዶቁ ጊዳይይ ያሲ ኢዛ ዚቁ ሂስቲኮ ኡፋዮቶ። 11 አዎ አርሼይ ፀጊዲ ማታ ሹሊሴስ፤ ማታ ጨሻይካ ሹሊስ፤ ኢዛ ሎዴቴሲካ ዳዮስ፤ ሄሳሶካ ዱሬይ ሃች ሃች ዳቡርሳን ዲሺን ኢዛ ዱሬቴሲ ዳዮስ።

12 ፓጮን ሚኒ ኤቁዳይይ ኢዚ አንጄቲዳይ። ጋሶይካ ኢዚ ፓጮራ ኤቁቲሺን ያሲ ባና ዶሲዛይታስ ኢሚዳ ሂዶታ ዴዎ አክሊሌ ኢዚ ኤካና። 13 አኒካ ፓጮቲዛ ጊዲኮ ታና ያሲ ፓጮስ ጎፖ፤ ጋሶይካ ያሲ አሴ ኢታን ፓጮና፤ ኢዚ ኦናካ ፓጪ ኤሬና። 14 ጊዶ አቲን ኢሲ ኢሲ አሲ ፓጮቲዛይ ባርካ ባ ኢታ አዎ ካሊሼኔ ባሌቲሼ ፓጮቴስ። 15 አዎይ ቃንሳቲዲ ናጋራ ዮሌስ፤ ናጋራይካ ዲጨዳፔ ጉዮ ሃይቆ ዮሌስ።

16 ታ ሲቆ ኢሻቶ! ኢንቴ ባሌቶፍቴ። 17 ሎዎ ኢሞቴሲኔ ኩሚሳ አንጄይ ወሪ ቦላ ሳሎ ፖዎታ አዎቴ ዎዴቴስ። ኢዛ አቻን ሄኔ ሃ ዩዩዛ ኤሻይካ ዴና። 18 ኑ ኢዛ ሚዴቴሳስ ኮይሮ ባይራታ ጊዳና ማላ ባ ሼኔኒኔ ባ ቱማ ቃላን ኑና ዮሊዴስ።

ሲዩዳይሳ አሶ

19 ዶሴቲዳ ታ ኢሻቶ! ሃይሳ ዩሺ ቆፒቴ፤ አሲ ወሪካ ሲያናስ ኤሶቶ፤ ሃሳያሲኔ ሃንቆስ ኤሶቶ። 20 አሳ ሃንቆይ ያሳ ዪሎቴሳ አሴና። 21 ሄሳ ጊሽ ቱናቴሲኔ ዳልጊዳ ኢታቴሳ ኢንቴሬ ኬሲ ዮጊዲ ኢንቴ ሼምፖ አሻናስ ዳንዳዩዛ ኢንቴ ጊዶን ቶኬቲዳ ቃላ አሽኬቴሳራ ኤኪቴ።

22 ቃላይ ጊዛይሳ አሲቴ አቲን ሚላ ሲሲ ዓላላ ሲዩዛይንታ ጊዲዲ ኢንቴርካ ኢንቴና ባሌሶፍቴ። 23 ቃላ ሲዩሼ ሲዩዳ ቃላይ ጊዛይሳ አሶንታይይ ባ አይፌሶ ማስቶቴራ ዪሊዛ አሳ ማላ። 24 ባና ዪሊ ቤዩዲ ቤስ፤ ኢዚ አይ ሚሳቲዛኮኔ ሄራካ ባሌቲሼስ። 25 ጊዶ አቲን ባና ጌሺዛ ሎዎ ዎጋ ዪሊ ቤዩዲ ኢዛን ሚኒዛይይ ባ ሲዩዳይሳ አሲዛይይኔ ባሎንታይይ ኢዚ ባ አሶን አንጄቲዳይ ጊዳና።

26 ባ ዱና ናጎንታ ባርካ ባ ዎዝና ባሌሲሼ ታ አማናይስ ጊዛይይ ባርካ ባና ባሌሴስ። ኢዛ አማኖይካ ሚላ ሃዳ አማኖ። 27 ያሳ አዎ ሲንሳን ኢታቴሲ ባይንዳ ሎዎ አማኖይ፤ “አያኔ አዎይ ሃይቁዳ

ናይታ፥ ኢስታ ኣዘናቲ ሃይቂዳ ማጫሳታ ሜቶቴቲሺን ማዶኔ ሃይሳ ኣላሜዛ ቱናቴሳፌ ባና ናጎ።

2

ኣጌይ ባይንዳ ማዶ ኮሺና

1 ታ ኢሻቶ! ኢንቴ ቦንቴቲዳ ጎዳ ዩሱስ ኪርስቶሳ ኣማኒዛይታ ጊዲዳ ማላ ኣሴ ቤሶንታ ኣጌራ ማዶፍቴ። 2-3 ዎርቃ ዩቕ ቤራዴን ኣሲዲ ሎዎ ማይዎ ማይዲዳ ኣሲ ኢንቴ ሺቂዛሶ ዩኮ ሄሳሶካ ቂታ ማይዎ ማይዲዳዴይ ሄ ሺቂዛሶ ዩኮ ቃሴካ ሃራ ቂታ ማይዎ ማይዲዳ ማንቆ ኣሲ ጌሊኮ ሎዎ ማይዲዳይሳ ዱማ ቦንቾ ቦንቹዲ “ኔስ ቤሲዛ ሎዎ ኡቴዛሶ ሄሳ ቤያ” ጊዲ ሃንኮ ማንቆዛ ቃሴ “ኔ ሄን ሄሳን ኤቃ፤ ዎይኮ ሃ ያ፥ ታ ጋርሳን ወጌን ኡታ” ኢንቴ ጊኮ፥ 4 ኢንቴ ኢንቴ ጊዶን ቤሶንታ ማዶ ኣሴታ ጊዴኬቴ? ቃሴካ ኢንቴ ኢታ ቆፋን ኣይኬቴዳ ኢታ ፐርዳ ፐርዲዛይታ ጊዴኬቴ?

5 ታ ሲቆ ኢሻቶ! ኣኔ ሲዩቴ፤ ኢስቲ ኣማኖን ዱሬታ ጊዳና ማላ ያሲ ባና ዶሲዛይታስ ሂዶታ ኢስታስ ኢሚዳ ካዎቴሳ ኢስቲ ላታና ማላ ሃይሳ ሃ ኣላሜዛን ዲዛ ማንቆታ ዶሪቤኔ? 6 ኢንቴ ቃሴ ማንቆታ ካወሺታ። ኢንቴና ዋይሲዛይ ዱሬታ ጊዴቴኔ? ኢንቴና ፐርዳሶ ጎቹዛይ ኢስታ ጊዴቴኔ? 7 ኢንቴናን ዌይጌቴዳ ቦንቾ ያሳ ሱንሳ ዚጊርዛይቲ ኢስታ ጊዴቴኔ?

8 ማፃፋን “ኔ ላጌ ኔ ሁዔ ማላ ሲቃ” ጌቴቲ ዓፌቴዳ ካዎ ዎጋ ኢንቴ ፖሊኮ ሎዎ ኣሴታ። 9 ኢንቴ ቤሶንታ ማዶ ማዲኮ ናጋራ ኣሴታ። ዎጋ ሲንሳንካ ኢንቴ ዎጋ ዩዲዳዴ ጊዲ ቆዴታና። 10 ጋሶይካ ዎጋ ወርሲ ፖሊዛዴይ ቃሴካ ዎጋፔ ኢሲኔዩን ዱጵቴዛ ኣሲ ወርሲካ ሞሪዳዴ ማላ ቆዴቴስ። 11 “ላይማቶፓ” ጊዳዴይ ኢዚካ ዛሪዲ “ዎዶፓ” ጊዴስ። ኔ ላይማቶንታ ኣጊኮካ ኔ ኣሳ ዎዲኮ ዎጋፔ ኣዲዳዴ ጊዳሳ። * 12 ኢንቴ ሃሳያ ሃሳዩሼ ዎይኮ ኢሲ ሚሽ ኣሴሼ ኢንቴና ዒሊሲዛ ኣሳ ማላ ጊዲቴ። 13 ጋሶይካ ማሮንታይ ወሪካ ማሮይ ባይንዳ ፐርዴታና። ማሮይ ፐርዳ ያኔስ።

ኣማኖኔ ኣሶ

14 ታ ኢሻቶ! ኢሲ ኣሲ ታስ ኣማኖይ ዴስ ጊኮ ቃሴ ኣሶን ቤሶንታዴ ጊዲኮ ኢዛ ኣይ ማዳኔ? ሄሳ ማላ ኣማኖይ ኢዛ ኣሻኔ? 15-16 ኣኔ ቆፐቴ፥ ኢሲ ኢሻይ ዎይኮ ኢሲ ሚቹያ ማይዎይ ዎይኮ ሚዛይሲ ባይንዳ ኣጊኮ ኢንቴፌ ኢሳዴይ “ኢንቴ ሳሮን ቤቴ!

* 2:11 ኬሳ 20:13-14፤ ዛሬ 5:17-18

ኢንቴና ሜጎፎ! ካሊቴ!” ጊኮ ኢስታ አሾስ ኮሺዛይሳ ኢሞንታ አጊኮ አይ ማዳኔ? 17 ሄሳሶካ አሶይ ባይንዳ አማኖይካ ባስ ሃይቂዳይሳ።

18 ጊዶ አቲን ኢሳዴይ “ታስ አሶይ ዴስ ኔስ አማኖይ ዴስ። ኔኒ ኔ አማኖ አሶፔ ሻካዳ ታና ቤሳ፤ ታ ቃሴ ታ አማኖ አሶን ኔና ቤሳና” ጊኮ። 19 ኔ “ኢሲ ያሲ ዲዛይሳ አማኖሳ” ሄሲካ ሎዶ፤ ዳይዳንሳቲካ ሄሳ ማላ አማኔቴሲኔ ኬሂ ኮኮሬቴስ። 20 ኔኖ ኤያዞ! አሶይ ባይንዳ አማኖስ ጎዳይ ባይንዳይሳ ኤራናስ ማርካ ኮያይ? 21 ኑ አዎ አብራሃሜይ ባ ና ዩሳቃ ያርሺዛሶዛ ቦላ ሺሺዳ ዎዴ አሶን ያሊቤኔ? * 22 ሄሳን አማኖዛ አሶራ ጋሲ አሲዛይሳ ኔ ቤያሳ፤ አማኖይካ አሶን ፖሌቲዴስ። 23 “አብራሃሜይ ያሴ አማኒዴስ፤ ሄ አማኖይ ኢዛስ ያሎቴሳን ቆዴቲዴስ” ጊዛ ማፃፋ ቃላይ ፖሌቲዴስ፤ ኢዚካ ያሲ ዶሲዳዴ ጌቴቲዴስ። * 24 ሄሳ ጊሽ አሲ አማኖን ፃላላ ጊዶንታ አሶንካ ያሊዛይሳ ኢንቴ ቤዬታ። *

25 ሄሳሶካ ላይማን ዲዛ ኤራዓባ ኪቴቲ ቢዳ አሳታ ሞካ ኤካዳ ሃራ አጌራ ሞዩዛ ዬዲዳ ጊሽ ባ አሶን ያላቤይኬ? 26 ሽምፖፊ ሻኬቲዳ አሾይ ሃይቁሳ ጊዲዳ ማላ አሶፔካ ሻኬቲዳ አማኖይ ሃይቁሳ።

3

ባ ዱና ናጎ

1 ታ ኢሻቶ! ኢንቴፌ ዳሮቲ አስታማሬታ ጊዶፔቶ፤ ጋሶይካ ኑ አስታማሬ ጊዲዳይቲ አዴሳ ፒርዳ ኤካናይሳ ኢንቴ ኤሬታ። 2 ኑ ዉሪካ ዳሮ ሚሻን ዱጴቶስ። ሃሳያን ዱጴቶንታዴይ ዲኮ ኢዚ ባ አሳቴሳ ሎዴሲ ናጋናስ ዳንዳዩዛ ኩሜሳ አሳ። 3 ኑኒ ፓራታ አዛዛናስ ቢፃላ ባርሲዲ ኑ ኮይዳ ማላ ኢስታ አዛዞስ። 4 ዎይኮ አኔ ማርካቤታ ያሊቴ። ኢስቲ አይ ጊታታኔ ጫርኮን ሱጌቲ ቢዛይታ ጊዲኮካ ማርካቤ ላጊዛዴይ ቁሪ ላፋ ላጊዛ ሚሻራ ባ ኮዩዛሶ ኤፌስ። 5 ሄሳሶካ አሳቴሳ ጋርሳን ኢንፃርሲ ጉሳ ጊዳ ኡታዳ ጊታ ዎልቃማ አቶሮ አቶሬታዉስ፤ ቁሪ ታማይ ጊታ ዎራ ዎስቲ ፀጊ ዳይሲዛኮኔ አኔ ዩሺ ቆፒቴ። 6 ኢንፃራሲካ ባ ባጋራ ታማ ማላ፤ ኑ አሳቴሳ ጊዶን ዲዛ ኢታ አላሜ። አሳቴሳ ዉርሳ ቱኒሳዉሲኔ አሳቴሳ ቦላ ታማ ጉጃዉስ፤ ባስካ ጋናሜ ታማን ፀጌታና።

* 2:21 ሜዴ 22:1-14 * 2:23 ሜዴ 15:6፤ 2ታር 20:7፤ ኢሳ 41:8
* 2:24 ኢያ 2:1-21

7 ሜሄይ፥ ዶዓይ፥ ካፎቲ ሃይሳሶካ ቢታ ቦላ ኅሹቲዛይታኔ አባ ጊዶን ዲዛ ሜዴቴሳታ ዉርሲ አሲ ሃራና ዳንዳዩስ፤ ኢስቲካ ሃራቲዳ። 8 ጊዶ አቲን ኢንፃርስ ሃራናስ ዳንዳዩዳዳይ እኒካ ዴና። ዎዲዛ ማርኬይ ኢዚን ኩሚዳሮኔ ኢዛ ሽምፓ ኤኮንታ ኢታ ሚሻ። 9 ኑኒ ኑ ኢንፃርሳይራ ኅዳኔ አዋ አንጀስ። ኢዚንካ ያሳ ሌሚሶን ሜዴቴዳ አሳ ናይታ ዛሪዲ ቃንጎስ። * 10 አንጀይኔ ቃንጌሲ ኢሲ ዱናራ ኬዜስ። ታ ኢሻቶ! ሄሲ ሄሳሶ ሃናናስ ቤሴና። 11 ኢሲ ፑልቶ አላፌ ማልፖ ሃሲኔ ጫሞ ሃሲ ፑልቲ ኤሪዜ? 12 ታ ኢሻቶ! ባላሴ ጌቲቲዛ ሚሲ ዎጋራ አይፌ ዎይኮ ዎይኔ ሚሲ ባላሴ ሚሳ አይፌ አይፋናስ ዳንዳዩዜ? ሄሳሶካ ጫሚዛ ሃላፌ ማልዒዛ ሃሲ ቤታና ዳንዳዩና።

ናምዑ ቆሞ ኤራቴስ

13 ኢንቴ ጋራሳፌ አኬካራ ዲዛ ኤራ አሲ እኔ? ኤራይ ዲዛ ጊዲኮ እኔ ባ አሶ አሽኬቴሳኒኔ አዶ ኤራቴሳሪ ባ ሎፖ ዱሳን ቤሶ። 14 ቃሴ ጫሞኔ ቃናቴይ፥ ኢንቴና ፃላላ ዶሲዛ ሃናይ ኢንቴ ዎዝናን ዲዛ ጊዲኮ አቶራቴስ ኢንቴስ ሲዮቶፎ። ቴማካ ካዶፊቴ። 15 ሂኒ ማላ ኤራቴሳያ ሳሎፕ ጊዲኩ። ሂና ቃሴ ቢታፌ፥ አሾፔኔ ፃላዔፕኮ! 16 ቃናቴይኔ ባርካ ባና ሲቆይ ዲዛሶን ዋሶይኔ ኢታ አሶይ ዉሪ ዴስ። 17 ሳሎፕ ጊዲዳ ኤራቴሳያ ጊዲኮ ኮይሮ ጌሻ፥ ጉዩፕካ ሳሮቴስ ዶሲዛሮ፥ ዳንዳዩዛሮ፥ ኤሮ ጊዛሮ፥ ማሮቴሲኔ ሎፖ አይፌይ ኩሚዳሮ፤ ቃሴ ዎርዶ ማዶንታሮኔ ኡሎን ጌኔይ ባይንዳሮ። 18 ሳሮቴስ ዶሲዛ አሳቲ ሳሮቴሳን ዜሪዲ ጊሎቴሳ አይፌ ማዔቴስ።

4

ኢንቴናቴሳ ያሳስ ሃሪሲቴ

1 ኢንቴ ጊዶን ዲዛ አላይኔ አሻይ አዋፕ ዩዴ? ኢንቴ ዎዝናን ዲዛ አሞቴሳፌ ዴንዲዳ አላ ጊዴኔ? 2 ኢንቴ አሞቴታ ሺን ዴሜኬታ። ኢንቴ አስ ዎዴታኔ ኬሂ አሞቴታ ሺን ዴማና ዳንዳዩኬታ። ኢንቴ ኢንቴ ጋርሳን አዩቲዛ ጊሻኔ አሌቲዛ ጊሽ ቃሴ ዎሶንታ ጊሽ ኢንቴስ ኢሜቴና። 3 ኢንቴ ኢንቴ አሾ አፋይሳናስ ኢታ ቆፋን ዎሲዛ ጊሽ ዎሲዳይሳ ኢንቴ ኤኬኬታ። 4 ኢንቴኖ ላይማቲዛይቶ! አላሜራ ሲቁቴሲ ያሳራ ሞርኩቴስ ጊዲዳይሳ ኤሬኬቲ? ሄሳ ጊሽ ሃይሳ አላሜዛራ ሲቁቴሲ ኮዩዛይ ዉሪካ ያሳስ ሞርኩ። 5 ዎይኮ ጌሻ ማፃፋ ጊዶን “ኑናን ኢዚ አይሲዳ አያናይ ኑ ኢዛይታ ጊዳና ማላ ዳሮ አሞቴስ” ጊዛይሲ ኢንቴስ ጮ ሜላ ጊዳ ሚሳቲዜ? 6 ጊዶ አቲን ኢዚ ባ ኪያቴስ ኑስ

* 3:9 ሜዴ 1:26

ጉጂ ኢሜስ። ማፃፋይካ “የሲ ኦቶራንቻታራ ኤቁቴስ፥ አሽኬታስ ቃሴ ባ ኪያቴስ ኢሜስ” ጊዳይ ሄሳሳ። *

7 ሄሳ ጊሽ ኢንቴና ያሳስ ሃሪሲቴ። ዳቡሎሳራ ኤቁቴቴ፥ ኢዚ ኢንቴፌ ባቃታና። 8 ያሳኮ ሺቂቴ፤ ኢዚካ ኢንቴኮ ሺቃና። ኢንቴኖ ናጋራንቻቶ! ኢንቴ ኢንቴ ኩሼ ጌሺቴ፥ ኢንቴ ናምዑ ቆፋን ቃጊዛይቶ! ኢንቴ ኢንቴ ዎዝና ጌሺቴ። 9 ዳርሲ ቆፒቴ፤ ሙዞቴቴ፤ ዩኪቴ፤ ኢንቴ ሚቻይ ዩሆን፤ ኡፋይሳይ ቃሴ ሙዞቴሳን ሲሞ። 10 ጎዳ ሲንሳን ኢንቴ ኢንቴና ካዉሺቴ፤ ቃሴ ኢዚ ኢንቴና ዶቁ ዶቁ ሂስታና።

11 ታ ኢሻቶ! ኢንቴ ኢንቴ ጋርሳን ኢሳይ ኢሳ ሞቶፒቴ፤ ባ ኢሻ ሞቴዛዴይኔ ባ ኢሻ ቦላ ፒርዲዛዴይ ዎጋ ቦላ ኢታ ሃሳዩሲኔ ዎጋ ቦላ ፒርዴስ። ሂስቲኮ ኔ ዎጋ ቦላ ፒርዲዛዴይ አቲን ዎጋ ናጊዛዴ ጊዳካ። 12 ዎጋ ዎሲዳዴይኔ ፒርዲዛዴይ ኢሳዴ ፻ላላ። ኢዚካ ዳይሳናሲኔ አሻናስ ዳንዳዩዛዴ። ጊዶ አቲን ኔኔ ኔ ላጌ ቦላ ፒርዲዛዴይ አኔ?

ጨቁታናስ ቤሴና

13 “ኢንቴ ሃቺ ዎይኮ ዎንቶ ሃኖ ሃ ካታማዮ ዎይኮ ሂኖ ሄ ካታማዮ ኑ ባና፤ ቢዲ ሄን ኢዚን ኢሲ ላይስ ኡታናኔ ዛልጊ ዎዲሳና” ጊዛይቶ! አኔ ሃ ሲዩቴ። 14 ዎንቶ ሃናናይሳ ኢንቴ ኤፊኬታ። ኢንቴ ሺምፖይ ኢዛ አዜ? ኢንቴ ጉሳ ዎዴ አይፌን ቤቲዲ ዳዩዛ ሃሳ ፔንታ ማላ። 15 ሃይሳ ጋናፔ “ጎዳ ሼኔ ጊዲኮኔ ኑ ፓፃ ዲኮ ሄሳካ ሃይሳካ አሳና” ጋናስ ኢንቴስ ቤሴስ። 16 ሃጊ ጊዲኮ ኢንቴ ኦቶሬቴሳን ጨቁቴታ። ሄሳ ማላ ኦቶሬቴሲ ዉሪካ ኢታ። 17 ሄሳ ጊሽ ሎዎ ጊዲዛይሳ አሳናስ ቤሲዛይሳ ኤሪሼ አሳንታዴስ ናጋራ ጊዳና።

5

ዱሬታስ ኢሜቲዳ ዞሬ

1 ሂስቲኮ ኢንቴኖ ዱሬ አሳቶ! አኔ ሲዩቴ። ቡሮ ኢንቴ ቦላ ጋካና ሜቶዛ ጊሽ ዩኪቴ፤ ዉ ዉይ! ጊ ዋሲቴ። 2 ኢንቴ ሃሮይ ቡቂዴስ፥ ኢንቴ ማይዎካ ቢላይ ሚዴስ። 3 ኢንቴ ዎርቃይኔ ኢንቴ ቢራይ ሺይዴስ። ሄ ሺይዳይሲካ ኢንቴ ቦላ ማርካቴሲኔ ኢንቴ አሾ ታማ ማላ ፀጌስ። ኢንቴ ዎዴ ዉርሴሳስ ሚሼ ሺሺዴታ። 4 ኢንቴ ኢንቴ ዎዝናን ዎሲቴ፤ ኢንቴ ካስ ማጊሼ ፔይዳይታስ ኢስታ ዎልቃ ዋጋ ኢንቴ ቃንዎንታ አጊዳ ጊሽ ኢንቴ ቦላ ዋሲሼ ኢንቴ አቻን ዴቴስ። ካስ ማጊዛይታ ዋሶይ ኡባ ዳንዳዩዛ ጎዳ ሃይሳን ጋኪዴስ። * 5 ኢንቴ ቢታ ቦላ ኢሻሎኔ

* 4:6 ሌም 3:34 * 5:4 ዛሬ 24:14-15

አልዔቲላን ደዲዴታ፥ ኢንቴ ዎዝና ሹካስ ዲኪዳ ሜሄ ማላ ሞዲሲዴታ። 6 ኢንቴ ኢንቴናራ ኤቁቶንታ ጊሎ አሳታ ቦላ ዎርዶ ዎሲዲ ዎዲዴታ።

ሜቶ ዳንዳዮ

7 ሄሳ ጊሽ ታ ኢሻቶ! ጎዳይ ሃ ያና ጋካናስ ዳንዳዮቴ። ጎሼ ጎዩዛዴይ ቢታይ ሎዎ ካሲ ካፃና ጋካናስ ዋኒ ዳንዳዮዛኮኔ ኮይሮ ኢራኔ ወርሴላ ኢራ ኢዚ ዎስቲ ናጊዛኮ አኔ አኪኪቴ። 8 ኢንቴካ ሄሳሶ ዳንዳዮቴ። ኢንቴ ዎዝና ሚንሳቴ። ጋሶይካ ጎዳ ዩሳ ጋላሲ ማቲዴስ።

9 ታ ኢሻቶ! ኢንቴ ኢንቴ ጊዶን ዚግሬቶፊቴ፤ ኢንቴ ዚግሬቲኮ ኢንቴ ቦላ ፐርዴታና። ፐርዳናዴይ ሄኮ ኢንቴ ፔንጌ ቦላ ኤቁዴስ። 10 ታ ኢሻቶ! ጎዳ ሱንላን ኢንቴስ ዮቲዳ ናቤታ ዋዩቴሲኔ ኢስታ ዳንዳዮ ኢንቴስ ሌሚሶ ሂስቲ ያሊቴ። 11 ዳንዳዮን ጌንጫዳ አሳታ ኑ ኢስታ “ኢስቲ አንጄቲዳይታ” ጊ ቆዲዛይሳ ኢንቴ ኤሬታ። ኢዮቤይ ዋኒ ዳንዳዮዳኮኔ ኢንቴ ኢዛ ጊሽ ሲዩዴታ። ጎዳይ ኢዛ ወርሴላን አይ አሲዳኮኔ ኢንቴ ቤይዴታ። ጎዳይ አሳስ ኬሂ ሚሼቲዛዴኔ ማሪዛዴ። *

12 ሃራፔካ ታ ኢሻቶ! ሳሎን ጊዲን ዎይኮ ሳፃን ጊዲን ዎይኮ አይ ሚሻንካ ጫቆፍቴ፤ “ኤ” ጋናስ ቤሲዛ ሚሽ ጊዲኮ “ኤ” ጊቴ። “አካይ” ጋናስ ጊዲኮ “አካይ” ጊቴ ሄሳፌ ሃራ ጊኮ ኢንቴ ቦላ ፐርዴታና። *

አማኖ ዎሳ

13 ኢንቴ ጋርሳን ሜቶቲዛ አሲ ዲዜ? ዲዛ ጊዲኮ ኢዚ ዎሶ። ኡፋዮቲዛዴይ ዲዜ? ዲዛ ጊዲኮ ኡፋይሳ ዩሶ ዩዎ። 14 ኢንቴ ጊዶን ሳኬቲዛ አሲ ዲዜ? ዲኮ ዎሳ ኬላ ጫማታ ያይጎ። ኢስቲካ ጎዳ ሱንላን ዛይቴ ኢዛ ቦላ ቲይዲ ኢዛስ ዎሴቶ። * 15 አማኖን ዎሲዳ ዎሳይ ሃርጊዳዴ ፓላና። ጎዳይካ ኢዛ ዴንላና። ኢዚ ናጋራ አሲዳዴ ጊዲኮካ ዎሲ ኢዛ ማራና። 16 ሄሳ ጊሽ ኢንቴካ ኢንቴ ጋርሳን ኢሶይ ኢሳራ ኢንቴ ናጋራ ፓዌቲቴ፤ ፓፃና ማላ ኢሶይ ኢሳስ ዎሲቴ። ጊሎ አሳ ዎሳይ ዎልቃራ ዴስ፤ ዎልቃማ አሶካ አሴስ። 17 ኤላሲ ኑ ማላካ አሳ። ኢዚ ኢራይ ቡኮንታ ማላ ሚንሳ ዎሲን ቢታ ቦላ ሄቩ ላይሴኔ ባጋ ጋካናስ ኢራይ ቡኪቤና። * 18 ቃሴካ ዛሪ ዎሲን ኢራይ ሳሎፔ ቢታ ቦላ ቡኪዴስ። ቢታይካ ካሳ ኢሚዴስ። *

* 5:11 ኢዮ 1:21-22፤ 2:10፤ ማዛ 103:8 * 5:12 ማቶ 5:34-37
* 5:14 ማር 6:13 * 5:17 1ካዎ 17:1፤ 18:1 * 5:18 1ካዎ 18:42-45

19-20 ታ ኢሻቶ! ኢንቴሬ ኢሳዴይ ቱማፔ ባሌቲን ሃራ አሲ
 ኢዛ ዛሪኮ ሄሳ ዎዝናን ዎሲቴ። ናጋራንቻ ኢዚ ባሌቲዳ ኦጌፔ ኢዛ
 ዛሪዳዴይ ሄሳዴ ሽምፖ ሃይቆፔ አሼሲኔ ኢዛዴ ናጋራ ዳሮዛካ
 ካሜሰ። *

* 5:19-20 ሌም 10:12፤ 1ጴፅ 4:8

አራሳ ጫቆ ማገፋ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 22 Sep 2022 from source files
dated 29 Jan 2022
dffa0cbb-5f77-5875-bf95-f4176677af45